



Krus di Mérito

Relato di nominadonan pa Krus di Mérito 2021

Sr. Cesario La Croes.

Nasé na Kòrsou 14 di yanüari 1936. Señor Cesario La Croes a kuminsá su karera komo maestro di skol básiko. Despues el a fungi na Akademia Pedagógiko komo dosente ku ta guia i traha riba formashon di maestronan di skol i hasi nan kompetente pa duna aritmétika realístiko na skol (antes básiko i awor skol di Fundeshi).

Na momento ku e tabata eduká nos muchanan el a nota ku den skolnan tabatin nesidat pa mehorá e área di aritmétika i matemátika, pa e motibu akí den su oranan liber el a yuda hopi mucha di e besindario di Soto i Barber pa pone nan konosementu riba e dos materianan akí riba nivel. Alabes e tabata yuda e hóbennan akí deskubrí i desaroyá nan mes riba diferente tereno. Tambe su pashon pa konstrukshon tékniko a hib'é pa yuda den sentro pre-eskolar, kaminda el a guía e renobashon pa logra amplia tur e áreanan di e sentro pre-eskolar (sala di beibi, kurá, kushina ets.) i krea mas espasio pa e formashon na nivel por tuma lugá.

Na aña 1970 el a kuminsá eksperimentá ku diferente método nobo pa por siña e muchanan mas mihó di forma ku nan por komprondé aritmétika/matemátika. E pashon grandi pa matemátika i aritmétika a pone ku na kualke pais ku el a bai, e tabata bishitá diferente skol pa sigui enrikesé su konosementu riba e tereno akí.

El a sinta komo presidente di direktiva i duna hopi konseho na tur ku tabatin mester den e ramo di pedagogia, duna kontenido na sentronan di mucha, skirbi i duna guia na guiadónan kon pa por sigui desaroyá nan mes, duna diferente tayer i e tabata miembro aktivo di e sindikato Sitek.





Krus di Mérito

Relato di nominadonan pa Krus di Mérito 2021

Sra. Maria Diwan

Nasé na Kòrsou 30 di sèptèmber 1939. Sra. Maria Diwan a kuminsá traha ku 16 aña komo sekretaria serka famia Pinedo. Pa 61 aña largu “Mama Maria”, manera tur e empleadonan tabata yam'é, a sirbi e empresa. Den su oranan liber e ta organisá eventonan pa e trahadónan di Coca Cola i a pèrkurá pa e empleadonan tin plaser den nan trabou. Maria ta stima su trabou i ta traha ku amor i hopi dedikashon. El a disidí ku e no ta baha ku penshun pero sigui duna su grasia na su trabou pa medio di su presensia ku e ta iluminá e empresa kuné. Nos ke remarká ku den silencio e ta yuda hopi persona ku tin nesesidat finansiero, sin a dibulgá esaki.

Su stèm trankil i sin igual ku tur hende konosé pa medio di su programa radial “Den Kibrá di Mardugá” ku ta masha inspirativo, ta drecha tur radiooyente su dia. E ta yuda hopi hende di terser edat di forma moral i ekonómikamente. Tambe e ta organisá pa esnan ménos prudente sena di Pasku ku un regalo simbólico aserka.

El a skirbi diferente buki pa mucha i poesia den nos dushi idioma Papiamentu i ku esaki e ta duna muestra ya pa años ku e ta un real protektor i defensor di nos dushi lenga Papiamentu. El a enrikesé i engrandesé nos literatura ku diferente produkshon manera: Chimichimi, Solo ta sali pa abo tambe, Union muhé Antiano, Awa fresku i hopi mas.





Krus di Mérito

Relato di nominadonan pa Krus di Mérito 2021

Sra. Grace Goede

Nasé na Kòrsou 21 di yanüari 1948. Sra. Grace a kuminsá su trayectoria komo dosente di skol básiko na Santa Clara na Jandoret . Di ei el a bai skol Ancila Domini komo dosente, direktor athunto i despues direktor. Di 1968 te ku 2003 el a eduká diferente generashon na skol. Sra. Grace semper ta kla pa yuda i komo dosente hopi biaha el a hañé konfrontá ku famianan den nesesidat ku e tabata yuda e ora ei ku su propio medianan.

Riba tereno di ‘padvinderij’ sra. Goede ta ainda aktivo for di 1966 i a destaká nashonal i internashonal den preparashon di hóben i lidernan pa por tuma desishonnan moralmente korekto i pa ta hende responsabel. E mishon ta basá riba prinsipionan di integridat, rèspèt, kreensia, kuido i koperashon.

Sra. Goede ta un motor den diferente organisashon ku ta yuda nos komunidad. E ta duna entre otro su kontribushon di e siguiente forma: ta miembro di direktiva i lider aktivo di Asosiyashon di Guia PNA pa mas ku 50 aña, tabata miembro di komishon Vishon Kòrsou, tabata miembro di Curaçao Association for Supervision for Curriculum Development, miembro i presidente di vários klup di Toasmasters, tesorero di fundashon Prinses Wilhelmina Fonds enkargá ku kolèkte anual for di aña 2013, Sekretaria di fundashon Hemayel Martina organisando plan di fakansi i selebrashon di Pasku pa muchanan di ménos rekurso pa 10 aña i hopi aktividat mas meritorio.





Krus di Mérito

Relato di nominadonan pa Krus di Mérito 2021

Sr. Ludwig Muyden

Nasé na Kòrsou 14 di yüli 1940. Sr. Ludwig Muyden a desplegá diferente trabou boluntario den nos komunidad, e.o. komo kordinadó di lès di músika na Kinderoord Brakkeput di aña 1998 pa 1999. El a sòru pa instrumentonan musikal i a duna lès di kuarta i di kitara. Tambe e tabata boluntario na Betesda for di 2001 te ku awor. E tabata bishitá e habitantenan pa hasi presentashon musikal. Aktualmente e ta enkargá ku organisashon di aktividat pa e habitantenan. Durante di COVID-19 el a yuda parti kuminda na Betesda.

Na Museo Marítimo el a desplegá trabou boluntario di 2001 te ku 2010. E tabata kordiná e rekorido pa skolnan i pa turistanan ku tabata bishitá e museo. Koningin Beatrix tambe a haña un rekorido serka djé durante su bishita. Tambe e tabata hasi rekorido di haf pa turista i hendenan lokal. Tambe Ludwig tabata ‘beheerder’ di klup de Oleander di aña 2001 te ku aña 2009.

E tabata enkargá ku ‘huiswerkbegeleiding’ i tambe aktividat despues di ora di skol. Na Kas mi Abilidat e tabata boluntario di aña 2006 te ku aña 2016. E tabata organisá diferente aktividat pa e klientenan ku desabilidat físiko. Na kompleho deportivo Cas Grandi di 2009 pa 2013, señor Ludwig tabata ‘beheerder’ i tabata responsabel pa e parti logístiko i organisashon di aktividatnan deportivo.





Krus di Mérito

Relato di nominadonan pa Krus di Mérito 2021

Sr. Cedric Ridderplaat

Nase na Kòrsou 14 di yüli 1944. Sr. Cedric (Ced Ride) Ridderplaat ta un historiadó, filósofo, edukadó, poeta, músiko, pintor, eskultor, eskritor, kompositor, areglista, kantante, interpreté i tin un bos in-igualabel.

E artista multi-fasétiko i multi-talento akí a komponé su músika ku un elemento personal den tur género di músika ku el a komponé. Ta di remarká ku e ta stimulá uso di nos idioma Papiamentu ku su arte. Tambe e ta representá nos pais den eksterior kaminda el a hiba nos idioma Papiamentu huntu kuné den tur produkshon i konsierto ku el a partisipá na dje.

E aporte di Cedric a hiba nos internashonalmente ku hopi komposishon den e presentashonnan durante un Kanto pa Kòrsou. Su komposishon i kansionnan ta marka nos historia artístiko kultural ku ta sirbi komo patrimonio nashonal di nos pais Kòrsou. Kansionnan manera Buchi Fil, Dòktor i Mi Pais ta kansionnan ku pa semper ta keda grabá den nos pa e karakterístika kultural emoshonal di nos pais. Kada piesa komponé pa Ced Ride, ta enrikesé nos kultura i stimulá nos pueblo pa eduká tur generashon tokante historia di Kòrsou.

